

La esperience di Natascia Gargano, gjornaliste di Davian trapiantade a Milan, che cu la so cooperative Fps Media e à a pene ricevût un impuartant ricognossiment european. >> DI CHRISTIAN ROMANINI



Gjornalisim Eurofurlan

Trente agns, di Davian, gjornaliste professioniste trapiantade a Milan e une des fondadoris di FpS Media, Fuori per Servizio, la cooperative di gjornalisim che e à a pene ricevût un impuartant ricognossiment di bande de Federazion europeane di gjornaliscj (www.europe.ifj.org), unic esempi in Italie.

Cheste e je in struc **Natascia Gargano**, ancje responsabile de pagjine musicâl da La Patrie dal Friûl (www.lapatriedalfriul.org).

Le vin sintude in ocasion de cerimonie de Efj che si è tignude a Viene.

Ce significât aie cheste menzion?

“Al è un ricognossiment a un gnûf mût di stâ intun marcjât cetant in crisi tant che chel de informazion. Fâ gjornalisim in maniere indipendente e inovative, ancje par une realtât piçule come la nestre, al è pussibil e al pues diventâ un model par altris”.

Cemût rivistu a Milan?

“Par frequetâ l’istitut Ifig Carlo De Martino, la storiche scuele bienâl di gjornalisim dal Ordin di Milan, che mi a permetût di fâ pratiche intes redazions des grandis testadis talianis”.

Cemût nassie la cooperative?

“E nas tal 2009 di un grup di zovin professioniscj vignûts fûr de scuele. Fâ rê e meti adun competencis, risorsis e ideis e je stade la intuizion par combati il precariât. Vuê la agenzie e dâ lavôr a 10 socis, etât medie 30 agns, e a une desine di colaboradôrs”.

Cuâl isal il to rapuart cu la identitât furlane?

“Al è un rapuart che o coltivi ogni dì. O colabori in maniere ative cul grup da La Patrie dal Friûl par sostignî la lenghe furlane e o cîr di dâ vôs e spazi al Friûl ancje tal gno lavôr par fâ cognossi di plui la nestre tiere e la nestre identitât”.

Ricognossiment european e gjornalisim in lenghe furlane: cemût viodistu il rapuart cun chescj 2 aspiets de tõe vite professionâl?

“Lis dôs robis no son in antitesi: si pues lavorâ in lenghe furlane cuntune mentalitât vierde e ‘europeiste’. O crôt intune Europe dai popui che e consideri lis minorancis une riecece”.

Davian ultimementri al somee il ‘luvin dal mont’: Luca Manfè al è to paisan e ancje lui une vore braurôs de sò identitât furlane; La Fieste dal Friûl si fasarà a Fane, Midun e Cjavàs... une bieie rispueste a cui che al sosten che Pordenon no sedi furlane: tu ce pensistu?

“Manfè al à fat une opare impuartante puartant il Friûl e la sò cusine tal mont. Dimostrazion che ognidun al pues fâ promozion tal so cjamp. La provincie di Pordenon e je vivarose e dal sigûr furlane. Dubis? Aio forsit di nomenâ Pasolini o Tavan?”.



ilfriuli@ilfriuli.it

L'APPEL AI ISCRITS

Pensâ a une gnove Associazion teatrâl

La assemblee de Associazion teatrâl furlane dai 24 di Març e à riconfermât president **Claudio Mezzelani**.

Lu compagnaràn tal diretif pal trieni 2014-2017: **Anna Pia Bernadis**, (vice presidente), **Marco Zamò**, (tesorîr), **Paolo Sartori** e **Fabio Zuliani**.



Claudio Mezzelani

La dificolât de Atf e je stade confermade di Mezzelani: “In chest moment di grande crisi e cui fonts che nus son stâts gjavâts, o domandin ai nestrîs iscrits, une assunzion di responsabilitât. O vin di pensâ une gnove Associazion teatrâl furlane”. Tra i prossims progjets a son sedi la continuazion dal concors par tescj teatrâi cu la stampe dai lavôrs de ultime edizion sedi, pussibilmentri, la produzion di un spetacul che al cjapi dentri dutis lis compagnîs des trê provinciis furlanis.

SCOLTADIS DI DRIUS

Masse piçul

Al jere cussì pizzul che, quand ch'al ploveve, al jere l'ultim a visasi.

Euronews informa

Scuelis de montagne: garantî la continuitât didatiche. A coventin presidis e insegnants in plante stabile

Confront a Tumieç inmaneât di bande de Provincie di Udin relatîf ai problemis de scuele de montagne cun parlamentârs, sindics, consêrs regionâi, Region e Uffici scolastic regional. Lis criticitâts a rivuardin in particular la mancance dai dirigjents scolastics, diretôrs amministratîfs e insegnants, une problematiche che, oltri che comprometi la continuitât didatiche, si riflet ancje su fameis e arlês che a scugnin confrontâsi ogni an cuntun dirigjent scolastic e amministratîf diviers. A suffrisin ancje i rapuarts cu lis istituzions teritoriâls (Comuns, Provincie e in gjenêrâl dutis lis amministrazions publichis in varis manieris cjapadis dentri tal setôr de istruzion) e il tiessût imprenditorîal locâl, cun rapuarts di ricostrûi di an in an propit pe mancance di una figure fisse in cjâf dal



istitut. “A chestis problematichis a van dadis rispuestis – al à dit il president de Provincie di Udin Pietro Fontanini – par vie che il disvilup e l’avignî di chest teritori, dulà che la fonde e je rapresentade dai zovins, al è in pericol. Duncje o domandin ai nestrîs parlamentârs di indi-

viduâ metodis e sistemis originâi par judâ lis zonis montanis dal Friûl e ancje dutis lis zonis periferichis di svantaç”. Su la stesse linie l’assessor provinciâl ae istruzion Beppino Govetto che al à ricuardât lis minôrs oportunitâts di cressite pai zovins di cheste zone respiet a chei

dai centris domandant normativis specificichis pes istituzions scolasticis di chescj teritoris. Ancje dal consêr cun deleghe ae montagne Luigi Gonano, l’invit e la necessitât di providiments urgjents par mudâ ande e tornâ a puartâ la int a vivi in montagne. Par chel che a rivuarde i dirigjents scolastics, vie pal incuintri, a son stadis fatis previsionis par dâ rispueste ae carence di organic: la esonerazion dal vicepreside dal insegnaments par puartâ indenand dome la ativitât di dirigjent rimplaçantlu in classe cuntun insegnant che lu sostituis fintremai al compiment des proceduris dal prossim concors (pussibilitât ilustrade de direttore dal Ustr Daniela Beltrame su la fonde de leç Carrozza); novitât su la assunzion dai dirigjents, insegnants e personâl Ata a son includudis intune propueste di Leç (353 dal 19 di Març dal 2013) cumò in discussione ae Comission culture istruzion de Cjamarie dai Deputâts.